

Garantir il provediment da basa?

■ (anr/ld) Il provediment da basa – che è da gronda muntada per la solidaritad en la communitad – na duai betg vegnir garantì pli ferm en la costituziun. Suenter ina engaschada debatta ha decì il cussegl naziunal da betg entrar en la fatschenta. Cun ina moziun aveva *Theo Maissen*, l'antèriur cusseglier dals chantuns, pretendì da garantir il provediment da basa en la costituziun. Il nov artitgel avess per mira dad incaricar ils chantuns e las vischnancas da garantir a tuts in provediment da basa che tegna quint dals bassegns. In suffizient provediment da basa saja da muntada centrala per la coesiun naziunala. Tar ils servetschs da basa sa tracti dal provediment cun electricitad, cun aua schubra, dal transport da persunas e da vitgira, plinavant il sector da la sanadad publica, la telecomunicaziun e la scolaziun.

Sin fundament da la moziun Maissen e conclus dal parlament ha elavurà il cussegl federal trais propostas. La varianta A prevesa mo l'incarica formulada en ina furma generala. La varianta B cuntegna la definiziun dal provediment da basa. La terza varianta numna princìps supplementars. Il cussegl federal recumonda dentant da desister d'in nov artitgel en la costituziun. Il cussegl dals chantuns propona la varianta A.

Franar la depopulaziun

Ier ha il cussegl naziunal manà ina debatta davart la moziun Maissen e las propostas dal cussegl federal. *Martin Candinas*,



(pcd/GR), il pledader da la cumissiun, ha preschentà il parairi da quella e punctuà la muntada da francar il provediment da basa pli ferm en la costituziun. Quest princip saja central per garantir er en las regiuns periferas in bun servetsch public e per franar la depopulaziun. Cun 13 encunter 11 vuschs recumonda la cumissiun d'entrar en la materia.

La proposta da la maioritad vegn sustegnida da la pcd/pev, da la ps e dals verds. Lur exponents fan attent a la muntada dal provediment da basa per

la solidaritad tranter las regiuns da muntogna e la Bassa. Divers oratur crititgeschan principalmain La Posta che reduceschia il servetsch da distribuiziun en las regiuns periferas e serria uffizis da posta. Cun il nov artitgel costituziunal vegnia garantì in provediment da basa dapertut e per pretschs rashunaivels.

Las partidas pps, pld e plv èn dal parairi che la formulaziun actuala en la costituziun tanschia. La proposta da la cumissiun saja be simbolica.

Suenter ina engaschada debatta d'entrada ha il cussegl naziunal dentant refusà d'entrar en la fatschenta cun 81 cunter 101 vuschs ed ina abstenziun. Cun quai è la chausa uss liquidada.

L'anr ha vulì conuscher l'emprema reacziun da Martin Candinas, che è s'engaschà fitg en favur dal territori muntagnard. Tenor sia giudicaziun èn stads decisivas per il na ponderaziuns finanzialas ch'il nov artitgel avess pudì evocar en l'avègnir.

L'idea da francar en la costituziun il provediment da basa è central per garantir er en las regiuns periferas in bun servetsch public e per franar la depopulaziun.

KEYSTONE